

武夷山志

新學
新學

PDG

武夷山志卷之十七

武夷董天工典齋氏編

籍溪羅良嵩極重刻男才有樂三氏校刊

名賢下

尋勝

陳

顧野王字希馮吳人陳天嘉中爲光祿卿奉使來閩至武夷嘆曰千巖競秀萬壑爭流美哉河山真人世所希覩也遂卜居崇安焉平生操履端嚴學問淹貫嘗撰建安記玉篇輿地志崇人學自野王始

唐

李商隱字義山號玉溪河內人唐開成進士調宏農尉又
中拔萃科補太學博士遷工部員外郎工詩與溫庭筠
段成式齊名當時號三十六體曾遊武夷有絕句一首
武夷題咏自此始也

南唐

張紹御史大夫嘗作冲佑觀銘

張嶠字景山崇安人太傅靄之子也南唐末隱居武夷宋
初任歙州通判會山寇至與太守龔慎儀協力拒守卒
却寇太宗朝超拜御史中丞累贈工部尚書子倣字希

古淳化進士官至工部侍郎孫湜滾皆爲郎

宋

李綱字伯紀邵武人政和元年及第歷事徽欽高宗三朝
宣和七年金人敗盟徽宗欲避有太子建牧之議綱爲
太常少卿刺血上書以太子監國無位號何以號召天
下疏入而內禪之議始決欽宗卽位累遷尙書右丞奏
對一主於戰於是以綱爲親征行營敵至兩戰却之進
樞密院封開國伯未幾議和之使冠蓋相望言者咎綱
主戰遂落職高宗卽位復除尙書右僕射兼中書侍郎
封開國侯進開國公卒奏黜張邦昌諸人以次謫以薦

宗澤爲開封留守許齡爲尙書右丞乃以阻巡幸吳汪
黃不合言者誣奏又落職凡七十五日而罷三移貶所
安置萬安軍紹興二年復除荆廣南路宣撫使兼知潭
州平湖南諸盜改江西安撫制置大使兼知洪州時建
康移蹕之議已定綱具奏其非遂乞祠去紹興十年正
月上元卒累贈太傅謚忠定綱負天下之望宋使至北
必問李綱安否史稱其出將入相南渡第一名臣也謫
劍浦時嘗屢遊武夷有詩賦平生著述凡數百卷

楊億字大年浦城人年十一應童子試詩賦立就賜袍笏
授秘書正字淳化中獻二京賦賜進士會會修冊府元

龜厯官工部侍郎真宗欲立德妃爲后使丁謂諷億草制竟不奉詔年僅四十七卒贈禮部尙書諡曰文嘗登臨武夷題咏甚富著書約二百卷有以武夷名集者

晏殊字同叔臨川人十四歲真宗召見賜同進士出身授秘書正字累官刑部同平章事卒贈司空諡元獻范仲淹歐陽修孔道輔皆出其門富弼楊察又爲其婿世以爲知人曾遊武夷有三仰峯棋盤石一律著文集四十卷及類要二府臨川集

陳襄字述古侯官人慶厯二年進士厯官侍御史時青苗法行襄請斥王安石曰惠卿以謝天下罷韓絳政府以

杜大臣爭利而進者^論年知制誥直學士院安石摘其
小失出知陳州徙杭州卒贈少師諡忠文襄早有盛名
居古靈山人稱古靈先生嘗言司馬光呂公著韓維可
備心膂不宜久令居外鄭俠狂直願乞生還又薦范純
仁蘇軾曾鞏程顥張載蘇轍等所著有古靈集遊武夷
詩

李彌遜字似之連江人大觀中進士累官戶部侍郎秦檜
主和議力詆之乞知漳州檜嫉黨論之落職家居十餘
年卒後朝廷思其忠節詔贈敷文閣待制諡忠肅嘗遊
武夷題詩於觀妙堂之東楹著有奏議外制議古文詩

集

謝源字資深臨川人成進士授建昌軍學教授歷南昌縣丞調邵武縣丞卒於官朱文公銘其墓碣有曰嘗以檄書便道過我旣去遊武夷山水間得余所結廬處復留詩見屬云著有空齋詩稿

袁樞字機仲建安人隆興元年試禮部第一爲嚴州教授與朱文公友善武夷精舍題咏最多嘗纂通鑑紀事本末叅政龔茂良上其書孝宗嘉歎遷大宗正主簿召對光宗受禪知常德府寧宗朝擢右文修撰再知江陵郡人受其德官至寶謨閣待制致仕著有易傳解辨異童

子問等書

留元綱字茂潛泉州人忠宣公正之孫也爲人有才畧抱
匡世之志官至秘閣校理直學士曾遊武夷小九曲有
紀遊刻字

吳棫字顧道甌寧人大觀初官至龍圖閣直學士再鎮成
都徽宗稱其清謹循良云

祝穆字和甫歙縣人其曾祖確爲朱文公外大父父康國
始遷崇安穆少名丙與弟癸俱從文公於武夷精舍得
聞緒論所著有事文類聚方輿覽勝蔡文肅與宰執陳
元鳳薦其賢除廸功郎子洙寶祐四年進士著述能紹

其學

方嶽字巨山號秋崖淳祐間知南康軍以忤賈似道去郡
著有秋崖小稿

呂勝已字李克建陽人紹興中殉難兵部尙書祉之子也
因奏勅葬父邵武遂居焉嘗與其甥方士繇來崇安受
學於文公以廕爲湖南幹官歷倅江州知杭州官至朝
請大夫自號渭川居士

潘植字立之懷安人父滋林拙齋高弟也黃文肅嘗學焉
植與弟柄來武夷從文公遊著觀象元契圖忘筌書性
理勉齋年譜柄字謙之志道最早著有易解尙書解學

者稱瓜山先生

林希逸字肅翁號虜齋福清人宋紹定間進士歷官有清聲仕至中書舍人多著述

翁易字粹翁崇安人通六經尤精春秋從學朱門與劉文簡蔡文節皆得其奧義人稱竹林先生子甫字景山寶慶進士歷太常卿江西漕使

張巽字子文晉江人父寓與張栻共學遣巽從遊時惠安劉鏡稱朱門高弟巽從之遊有所聞未能釋然乃謁朱子于武夷退而喜曰吾固謂其不止是也旣歸涵養靜修人稱錦溪先生

王阮字南卿江州人父彥博勤王有功阮稱將種議論奮發時張栻守袁州阮就焉又就學於文公文公與語大悅之登隆興元年進士知濠州金人不敢南侵奏事人京韓侂冑慕其名遣客通意阮曰劉歆柳宗元失身匪人爲萬世笑吾肯造其門哉侂冑怒批旨予祠遂歸蘆

山有義豐集

建陽有蘆山卽朱文公結廬之雲谷

廖德明字子晦順昌人乾道己丑進士嘗毀莆田淫祠破桂陽劇盜仕至吏部左選郎嘗曰吾居官惟用三代直道而行一句著有春秋會要槎溪集受業文公編輯語錄從遊武夷六曲響聲巖文公所勒題名子晦與焉

范念德字伯崇建陽人從朱文公學嘗深贊其所著雜說
又屬其修正禮書仕宜黃令六曲溪北文公勒同遊諸
君有其姓字

林得遇字若時仙遊人初質鈍有志於學鬻粳至武夷
師事文公文公令日讀論語集註遂由此悟入卒以名
儒聞

鄭昭先字景紹閩縣人淳熙丁未進士授浦城簿自以未
嘗學間來武夷受業於朱子遷歸安令邑人愛戴之愿
官諫議大夫知樞密院事進右丞相立朝數有奏章言
皆切直卒諡文靖著有日湖遺稿五十卷

楊至字至之晉江人蔡文節公之婿也師事文公嘗從遊
於武夷輯文公語錄二卷

詹淵字景憲崇安人師事文公登慶元乙未科官臨江戶
曹掾數十年滯牘一閱得情後監行在車輅院

林成季字井伯莆田人文節公光朝之從子也嘗至武夷
從朱文公遊趙忠定公帥閩禮爲上客每事諮之嘉泰
二年以特奏名授興國軍判官

陳範字朝弼崇安人文公弟子本籍建陽居五夫里舉嘉
定甲戌進士授婺源尉留心民瘼秩滿遷丞崇仁偶有
疾自嘆云倘來軒冕心無必見在詩書足自娛遂歸隱

里門不復出

劉子寰字圻父建陽人嘉定丁丑進士仕至觀文閣學士
早受學於文公自號黃鵬翁有詩名劉文定克莊序其
集嘗題毛竹洞挨人石有今人自取捷徑行却嗔山石
能挨人之句

包君定永嘉人嘗至武夷從文公講學稱其用意精密黃
勉齋送徐居父序云淳熙甲辰始識君定於武夷

周明作字元興建陽人從文公學著有王子問答語錄考
劉應李字希泌號省軒建陽人從真西山遊登咸淳甲戌
進士授本縣尉入元不仕與熊勿軒禾講學於洪源書

堂十有二年後建化龍書院於西山之麓以教生徒熊
勿軒爲之記著有易經精義傳道精語又編輯翰墨全
書

翁合字叔備崇安人嘉熙進士歷官中外有聲終侍講有
丹山集遊武夷有詩

范師孔字學可崇安人咸淳間預恩薦讀書武夷書院三
司聞其名辟充講書素工詩有畫餅集行世子棄字不
遐亦以詩名

翁彥約字行簡崇安人仲通之子也政和二年登第調常
州刑曹召爲編修官定九域志遷太常博士尋提舉河

北西路學憲知汝州高郵皆有茂績著詩文集十卷於
武夷山題咏最多弟彥深太常少卿撰述亦富彥國御
史中丞

劉子羽字彥修崇安人忠顯公幹長子初以蔭除修撰嗣
以浙東帥屬佐父破方臘又從守真定戮力禦敵建炎
三年張浚宣撫川陝辟爲叅謀時提舉御營范瓊本汴
京叛臣子羽爲浚謀招之議事以計誅之金人入興元
四川大震子羽築壘於毒潭山敵遣十人持書招誘子
羽斬之而縱其一曰爲吾語賊吾有死耳何可招也敵
會疫癘引衆還子羽掩其後敗之以是全蜀後知鎮江